

II. Ofialeco kaj Fontindikoj

La listo de la fundamentaj kaj de la oficialaj vortoj en P.V. ne ĉie koincidas kun listoj de aliaj vortaroj; tial mi kun pedanta zorgo kontrolis ĝin tutan laŭ la originalaj dokumentoj: *Fundamento de Esperanto*, la ses *Oficialaj Aldonoj* kaj la *Cirkuleroj* de la Lingva Komitato. Sed mi devas averti, ke en la Fundamento mi ne konsideris la Antaŭparolon, nek en la Unua Oficiala Aldono la piednoton.

Ĉar la kriterio uzita de Grosjean-Maupin en sia «Klasika Libro de Esperanto» (kiu principe servis kiel referencilo por la P.V.) estis pli vasta ol la mia, kaj ĉar eniĝis krome kelkaj preseraroj aŭ konfuzoj, mi opinias utila doni detalan liston de la farendaj ŝanĝoj (la vortojn, kiuj estas montritaj kiel fundamentaj, respektive oficialaj, sole nur de la «Klasika Libro», eldono 1927, mi signas ĉi-sube per asterisko):

- 1) estas nek fundamenta, nek oficiala — kaj devas perdi sian kapsteleton kaj majusklan komencliteron: ARĤAISMO*;
- 2) ne estas fundamentaj — kaj devas perdi sian kapsteleton (sed estas ja oficialaj kaj konservas la komencan majusklon): DOGMO*, KRESTOMATIO, PARADOKSO*, SUPERLATIVO*;
- 3) ne estas oficialaj — kaj devas perdi sian komencan majusklon: ABOL(ICI)I, AGRONOMO*, ANALOGIO, ANTROPOLOGO*, ARISTOKRATIO*, AROGI*, DEMOKRATIO*, IMPERIALISTO*, JEZUO*, KALVARIO, KAMPANJO, KANALIZI, KATEĤISMO* (KATEKISMO*), MONARĤIO* (MONARKIO*), MONOTEISTO*, NUMERALO*, PLUTOKRATO*, POLITEISTO*, PROTESTANTO, ROJALISMO*, SPIRITISMO*, ZOOLOGO*;
- 4) ne estas zamenhofaj — kaj devas perdi la signon ^z: LITINO, ŜABLONO, ŜILO, TRUBADURO, VARIETEO;
- 5) Apud la formo TEKNIKO estas ankaŭ oficiala la formo TEĤNIKO;
- 6) Estas fundamentaj — kaj devas alpreni la kapsteleton (la vortoj inter krampoj jam havas ĝin en P.V.): AKTIVA, ALFABETO, BALO, CENTIMO, (ĈIAL, ĈIES, ĈIOM), DIPLOMATO, DIPLOMATIO, DOKTORO, ENERGIO, ESPERANTO, FI, FIZIKO, FOTOGRAFO, GEOGRAFO, JURISTO, KILOMETRO, (KOPEKO, METRO, MILIONO, NAIVA, NENIAL, NENIOM, PFENIGO, PREFIKSO, PROJEKTO), REZULTATO, SCENO, (SISTEMO, SOFISMO, SPECIALA, SUFIKSO, TEATRO, TELEGRAFO, TEORIO, TIES), ZOOLOGIO — ĉiuj vortoj entenataj en la *Fundamenta Ekzercaro* ¹.

¹ Konforme al la plano de la P. V., mi preterlasis la literonomojn, la proprajn nomojn de la *Fundamenta Ekzercaro* kaj la gramatikajn finaĵojn de la *Universala Vortaro*. Sed, laŭ la § 42 de la Ekzercaro, oni devas rigardi la um-vortojn kiel memstarajn radikojn; jen do la listo de la fundamentaj: AERUMI, AMINDUMI, BRULUMO, BUŜUMO, BUTONUMI, GUSTUMI, KALKANUMO, KOLUMO, KOMUNUMO, KRUCUMI, LAKTUMO, LOTUMI, MANUMO, MASTRUMI, NAZUMO, PALPEBRUMI, PLENUMI, MALVARMUMI, VENTUMI.